

RESOLUCIÓN POLA QUE SE MODIFICA O PERÍODO PARA A COLOCACIÓN DE CORDAS COLECTORAS DE SEMENTE DO MEXILLÓN NO ÁMBITO DE COMPETENCIA DO DEPARTAMENTO TERRITORIAL DA CONSELLERÍA DO MAR EN VIGO

ANTECEDENTES

1. Por resolución do 27 de setembro de 2024, este departamento territorial resolveu modificar o período polo que se autoriza a colocación de cordas colectoras de semente de mexillón en bateas, establecido no artigo 36.2 do Decreto 406/1996, do 7 de novembro, ampliándoo ata o 30 de novembro do 2024 no ámbito da súa competencia territorial.
2. O día 19 de novembro do 2024, FEMEX (Federación de Asociacións de Mexilloeiros) solicita ampliar o período de colocación de cordas colectoras ao 31 de decembro de 2024.
3. O 22 de novembro do 2024, solicítase informe aos membros da Comisión do Mexillón. Remitiron contestación, formulando nalgúns casos as respectivas peticións individuais, as seguintes entidades: Sociedade Cooperativa de Mexilloeiros de Galicia Socomgal, Federación de Asociacións de Mejillones de Arousa y Norte "FARN", Asociación de Mejilloneros San Saturnino, Asociación de Mejilloneros Profesionales A Marxa, Amegrove Soc. Cooperativa Galega, Asociación Mexilloeiros Illa de Arousa, Asmecruz, Sdad. Coop. e Organización de Produtores de Mejillón de Galicia "Opmega".
4. O 28 de novembro 2024 o Director xeral de Pesca, Acuicultura e Innovación Tecnolóxica emitiu informe no que indica que, unha vez consultada a Comisión de Mexillón, non observa ningún inconveniente en que se concedan con carácter excepcional as pretensións mencionadas.
5. O 29 de novembro 2024 o Director xeral de Pesca, Acuicultura e Innovación Tecnolóxica resolveu ampliar o prazo establecido na súa Resolución do 27 de setembro de 2024, pola que se autorizou con carácter extraordinario e atendendo a circunstancias excepcionais desta campaña a colocación de ata 50 cordas colectoras máis por batea, así como o aumento da lonxitude das cordas colectoras ata os 12 metros en todos os polígonos de cultivo de Galicia, **ata o 31 de decembro de 2024**.

CONSIDERACIÓNS LEGAIS E TÉCNICAS

1. O artigo 36 do Decreto 406/1996, do 7 de novembro, polo que se aproba o Regulamento de viveiros de cultivos mariños de Galicia, dispón:

"1. Poderán colocarse cordas colectoras de semente do mexillón sempre que o número total de cordas da batea non sobrepase a densidade e número máximo a que se refire o artigo anterior.





2. *Independentemente do recollido no punto anterior, no período que vai dende o 1 de abril ata o 30 de setembro, autorízase a colocación de cordas colectoras de semente do mexillón en bateas de modo que o seu número non sobrepase as 100 respecto ao máximo que lle corresponde á dita batea.*

*Cando fenómenos medioambientais excepcionais alteren o ciclo normal de reprodución da especie, modificándose a época de fixación larvaria, a delegación territorial (agora departamento territorial), dentro do ámbito da súa competencia **poderá variar o dito período, previa petición da maioría de entidades representativas do sector e informe da correspondente unidade técnica administrativa.***

En todo caso, unha vez finalizado o período, o número de cordas axustarase ao que corresponda á batea.

3. *As cordas colectoras, que terán libre un dos seus extremos, non poderán ter máis de cinco metros de lonxitude contados a partir da superficie do mar. Cada unha delas deberá estar claramente identificada mediante unha marca de color roxo intenso, na súa parte superior, dunha lonxitude mínima de 30 cm que a diferencia perfectamente das cordas de engorde.”*

2. O Director xeral de Pesca, Acuicultura e Innovación Tecnolóxica emitiu informe o 28 de novembro de 2024, respecto da solicitude mencionada nos antecedentes desta resolución, no que deixa constancia de que *“non observa ningún inconveniente en que se conceda con carácter excepcional as pretensións mencionadas.”*

3. De acordo co citado artigo 36.2 do Decreto 406/1996, do 7 de novembro, polo que se aproba o Regulamento de viveiros de cultivos mariños de Galicia, a competencia para ditar a presente resolución correspóndelle a persoa titular do departamento territorial correspondente.

Á vista do exposto, **RESOLVO**

Ampliar ata o 31 de decembro do 2024 o período polo que se autoriza a colocación de cordas colectoras de semente do mexillón en bateas no ámbito territorial deste departamento.

Esta modificación do período de colocación das cordas colectoras queda suxeita ás seguintes condicións:

Primeira. A ampliación afecta á permanencia das cordas colectoras colocadas no período legalmente establecido neste ano 2024, tendo en conta que por resolución da Dirección xeral de Pesca, Acuicultura e Innovación Tecnolóxica do 29 de novembro de 2024 autorizouse, con carácter extraordinario e atendendo ás circunstancias excepcionais, a colocación de ata 50 cordas colectoras máis por batea, así como o aumento de lonxitude das cordas colectoras ata os 12 metros en tódolos polígonos de cultivo de Galicia ata o 31 de decembro de 2024.

Non se autoriza a colocación de novas cordas colectoras respecto das xa colocadas no período legalmente establecido.





Segunda. As persoas concesionarias que fagan uso destas condicións deberán comunicar previamente e con antelación suficiente o número de cordas colectoras que permanecerán no período extraordinario (do 1 de decembro ata o 31 de decembro de 2024), indicando o nome do viveiro e a súa localización, á Subdirección Xeral de Acuicultura, Dirección Xeral de Pesca, Acuicultura e Innovación Tecnolóxica da Consellería do Mar.

A comunicación poderá ser realizada a través do modelo PR004 ou do correo electrónico servizo.innovación.acuicultura.cmr@xunta.gal.

En todo caso, para os efectos de realizar o correspondente seguimento técnico, os titulares dos viveiros deben colaborar co persoal da Consellería do Mar facilitándolles a información que lles sexa requirida.

Terceira. De acordo co artigo 36.3 do Decreto 406/1996, do 7 de novembro, polo que se aproba o Regulamento de viveiros de cultivo nas augas de Galicia, as cordas colectoras terán libre un dos seus extremos e deberán estar claramente identificadas mediante unha marca de cor vermella intensa, na súa parte superior, dunha lonxitude mínima de 30 cm que as diferencien perfectamente das cordas de engorde.

Contra a presente resolución, que non pon fin á vía administrativa, as persoas interesadas poderán interpoñer recurso de alzada ante a persoa titular da Consellería do Mar, no prazo dun mes contado a partir do día seguinte ao da súa notificación, de conformidade co disposto nos artigos 121 e 122 da Lei 39/2015, do 1 de outubro, do procedemento administrativo común das Administracións Públicas.

Vigo

A directora territorial

